

Nunap immikkoortuini mittarfinnik tulleriiaarinissamut tunngavissat pillugit Inatsisartut aalajangiiffigisassaattut siunnersuut
(Ineqarnermut Attaveqaqatigiinnermullu Naalakkersuisoq)

Akissuteqaat

(Ineqarnermut Attaveqaqatigiinnermullu Naalakkersuisoq)

Aappassaanneerreqarnera

Naalakkersuisut sinnerlugit Sanaartornermut Ataatsimiititaliaq siunnersuummik peqqissaarussilluni sulineranut qutsavigerusuppara.

Inatsisartunit arlaleriarluni oqaatigineqarpoq, nunatsinni ineriartortitsinermi pitsaasunik ataqatigiinnillu attaveqaateqarnissaq pingaaruteqartoq qitiulluinnartorlu. 2019-imi upernaakkut ataatsimiinnermi imm. 134-p ataani Naalakkersuisut nunap immikkoortuini aamma nuna tamakkerlugu attaveqaatinut ataatsimoortumik pilersaarusiornissamut kaammattorneqarnerat akuerineqarpoq.

Naalakkersuisunit kaammattuineq tusaatissatut tiguneqarpoq, aammalu assartuussinermut pilersaarusiorneq aallartinneqarpoq. Nunap immikkoortuini mittarfiit sulianut taakkununnga ilaatinneqarput.

Attaveqaatitsinnik annertusaanissaq, taamaalillutalu atortunik nutaaliaasunik atuisinnaalernissaq aammalu nunap pitsaanagerusumik ataqatigiilernissaa Naalakkersuisunut pingaaruteqartorujussuuvoq. Aamma najugaqarfinit minnerusunit taakkununnga ilaasunik, utoqqarnik, napparsimasunik nassiussanillu assartuussinissamut periarfissanik pilersitsinissarput pingaartinneqarpoq.

Attaveqaatit qanoq annertusaavigineqassanersut tulleriiaarinerlu qanoq isikkoqassanersoq politikkikkut annertuumik aalajangigassaavoq. Nunap immikkoortuini misissueqqissaarnerit siunissami attaveqaatit ilaannut, taakkununnga attuumassuteqartunut politikkikkut isummertoqarsinnaanissaanut tapertarineqassapput.

Tassalu siunissami ajornakusoortunik aalajangiisoqartussaavoq, aammalu sakkortuumik tulleriiaarisoqartussaalluni. Suliassaq taanna Naalakkersuisunit annertuumik pingaartinneqarpoq, uangalu siuttuunissannut qilanaartorujussuuvunga.